

《佛說無量壽經》卷下

曹魏康僧鎧 譯

乙二、下化（分五）

丙一、會五乘同歸一乘（分二）

丁一、三輩往生（分二）

戊一、佛國攝生總示（分三）

己一、國皆正定

佛告阿難：「其有眾生，生彼國者，皆悉住於正定之聚。所以者何？彼佛國中，無諸邪聚，及不定聚。」

己二、諸佛共讚

「十方恆沙諸佛如來，皆共讚歎，無量壽佛威神功德不可思議。」

己三、往生正因

「諸有眾生，聞其名號，信心歡喜，乃至一念至心迴向，願生彼國，即得往生，住不退轉。唯除五逆，誹謗正法。」

戊二、正明三輩往生（分四）

己一、總舉三輩

佛告阿難：「十方世界，諸天人民，其有至心，願生彼國，凡有三輩。」

己二、別明上輩（分三）

庚一、修因

「其上輩者，捨家棄欲而作沙門，發菩提心，一向專念無量壽佛。修諸功德，願生彼國。」

庚二、得果

「此等眾生，臨壽終時，無量壽佛，與諸大眾，現其人前，即隨彼佛，往生其國。便於七寶華中，自然化生，住不退轉，智慧勇猛，神通自在。」

庚三、勸修

「是故阿難！其有眾生，欲於今世見無量壽佛，應發無上菩提之心，修行功德，願生彼國。」

己三、別明中輩（分三）

庚一、修因

佛告阿難：「其中輩者，十方世界，諸天人民，其有至心願生彼國，雖不能行作沙門，大修功德，當發無上菩提之心，一向專念無量壽佛。

多少修善，奉持齋戒，起立塔像，飯食沙門，懸繒燃燈，散華燒香，以此迴向，願生彼國。」

庚二、得果

「其人臨終，無量壽佛，化現其身，光明相好，具如真佛，與諸大眾，現其目前。即隨化佛往生其國，住不退轉。」

庚三、較量

「功德智慧，次如上輩者也。」

己四、別明下輩（分三）

庚一、修因

佛告阿難：「其下輩者，十方世界，諸天人民，其有至心欲生彼國。假使不能作諸功德，當發無上菩提之心，一向專意，乃至十念，念無量壽佛，願生其國。

若聞深法，歡喜信樂，不生疑惑，乃至一念，念於彼佛，以至誠心，願生其國。」

庚二、得果

「此人臨終，夢見彼佛，亦得往生。」

庚三、較量

「功德智慧，次如中輩者也。」

丁二、十方稱歎（分二）

戊一、長行（分二）

己一、諸佛稱歎彌陀

佛告阿難：「無量壽佛，威神無極。十方世界，無量無邊不可思議諸佛如來，莫不稱歎。」

己二、菩薩共生供養

「於彼東方恆河沙佛國，無量無數諸菩薩眾，皆悉往詣無量壽佛所，恭敬供養，及諸菩薩聲聞之眾，聽受經法，宣布道化。南西北方，四維上下，亦復如是。」

戊二、偈頌（分三）

己一、頌菩薩共生

爾時世尊，而說頌曰：

「東方諸佛國，其數如恆沙，彼土菩薩眾，往觀無量覺。

南西北四維，上下亦復然，彼土菩薩眾，往觀無量覺。

一切諸菩薩，各齎天妙華，寶香無價衣，供養無量覺。

己二、頌彌陀授記

咸然奏天樂，暢發和雅音，歌歎最勝尊，供養無量覺。
究達神通慧，遊入深法門，具足功德藏，妙智無等倫。
慧曰朗世間，消除生死雲，恭敬繞三匝，稽首無上尊。
見彼嚴淨土，微妙難思議，因發無量心，願我國亦然。」

「應時無量尊，動容發欣笑，口出無數光，遍照十方國。
迴光圍繞身，三匝從頂入，一切天人眾，踴躍皆歡喜。
大士觀世音，整服稽首問，白佛何緣笑，唯然願說意。
梵聲猶雷震，八音暢妙響，當授菩薩記，今說仁諦聽。
十方來正士，吾悉知彼願，志求嚴淨土，受決當作佛。
覺了一切法，猶如夢幻響，滿足諸妙願，必成如是剎。
知法如電影，究竟菩薩道，具諸功德本，受決當作佛。」

通達諸法性，一切空無我，專求淨佛土，必成如是刹。」

己三、頌諸佛稱歎（分二）

庚一、諸佛共歎（分二）

辛一、勸往

「諸佛告菩薩，令覲安養佛，聞法樂受行，疾得清淨處。」

辛二、得益

「至彼嚴淨國，便速得神通，必於無量尊，受記成等覺。」

其佛本願力，聞名欲往生，皆悉到彼國，自致不退轉。

菩薩興至願，願己國無異，普念度一切，名顯滿十方。

奉事億如來，飛化遍諸刹，恭敬歡喜去，還至安養國。」

庚二、頌釋尊獨歎（分三）

辛一、歎此經難信

「若人無善心，不得聞此經，清淨有戒者，乃獲聞正法。曾更見世尊，則能信此事，謙敬聞奉行，踴躍大歡喜。憍慢弊懈怠，難以信此法，宿世見諸佛，樂聽如是教。」

辛二、歎佛智深廣

「聲聞或菩薩，莫能究聖心，譬如從生盲，欲行開導人。如來智慧海，深廣無涯底，二乘非所測，唯佛獨明了。假使一切人，具足皆得道，淨慧知本空，億劫思佛智，窮力極講說，盡壽猶不知。佛慧無邊際，如是致清淨。」

辛三、勸聞法精進

「壽命甚難得，佛世亦難值，人有信慧難。若聞精進求，聞法能不忘，見敬得大慶，則我善親友。是故當發意，設滿世界火，必過要聞法，會當成佛道，廣度生死流。」

丙二、較勝劣勸修往生（分八）

丁一、補處菩薩（分五）

戊一、位尊壽永

佛告阿難：「彼國菩薩，皆當究竟一生補處，除其本願為眾生故，以弘誓功德，而自莊嚴，普欲度脫一切眾生。」

戊二、身光微妙

「阿難！彼佛國中，諸聲聞眾，身光一尋。菩薩光明照百由旬。有二菩薩，最尊第一，威神光明，普照三千大千世界。」

阿難白佛：「彼二菩薩，其號云何？」

佛言：「一名觀世音，二名大勢至，此二菩薩，於此國土，修菩薩行，命終轉化，生彼佛國。」

戊三、身相具足

「阿難！其有眾生，生彼國者，皆悉具足三十二相。」

戊四、成德殊特

「智慧成滿，深入諸法，究暢要妙，神通無礙，諸根明利。其鈍根者，成就二忍。其利根者，得不可計無生法忍。」

戊五、永離惡趣

「又彼菩薩，乃至成佛，不受惡趣，神通自在，常識宿命。除生他方五濁惡世，示現同彼，如我國也。」

丁二、供佛歎德

佛語阿難：「彼國菩薩，承佛威神，一食之頃，往詣十方無量世界，恭敬供養，諸佛世尊。」

隨心所念華香伎樂，衣蓋幢幡，無數無量供養之具，自然化生，應念即至。珍妙殊特，非世所有。輒以奉散諸佛，及諸菩薩聲聞之眾。

在虛空中化成華蓋，光色昱爍，香氣普熏。其華周圍四百里者，如是轉倍乃覆三千大千世界，隨其前後，以次化沒。

其諸菩薩，僉然欣悅，於虛空中，共奏天樂，以微妙音，歌歎佛德，聽受經法，歡喜無量。

供養佛已，未食之前，忽然輕舉，還其本國。」

丁三、彌陀說法

佛語阿難：「無量壽佛，為諸聲聞菩薩天人頒宣法時，都悉集會七寶講堂，廣宣道教，演暢妙法，莫不歡喜，心解得道。

即時四方，自然風起，吹七寶樹，出五音聲。無量妙華，隨風四散，自然供養，如是不絕。

一切諸天，皆齋天上百千華香，萬種伎樂，供養其佛，及諸菩薩聲聞之眾。普散華香，奏諸音樂，前後來往，更相開避。當斯之時，熙怡快樂，不可勝言。」

丁四、菩薩修持（分二）

戊一、化他修

佛語阿難：「生彼佛國諸菩薩等，所可講說，常宣正法，隨順智慧，無違無失。」

戊二、自行修（分六）

己一、施行離過

「於其國土，所有萬物，無我所心，無染著心。」

己二、戒行離過

「去來進止，情無所係。隨意自在，無所適莫。無彼無我，無競無訟。」

己三、忍行離過

「於諸眾生，得大慈悲饒益之心。柔潤調伏，無忿恨心。」

己四、勤行離過

「離蓋清淨，無厭怠心。」

己五、合明六度離過

「等心，勝心，深心，定心，愛法樂法喜法之心。」

己六、總明惑滅苦除

「滅諸煩惱，離惡趣心」。

丁五、菩薩功德（分五）

戊一、總歎

「究竟一切菩薩所行，具足成就無量功德。」

戊二、別歎（分三）

己一、六通自在

「得深禪定，諸通明慧。遊志七覺，修心佛法。」

己二、五眼圓明

「肉眼清徹，靡不分了。天眼通達，無量無限。」

法眼觀察，究竟諸道。慧眼見真，能度彼岸。
佛眼具足，覺了法性。」

己三、四智具足（分四）

庚一、具成所作智

「以無礙智，為人演說。等觀三界，空無所有。
志求佛法，具諸辯才，除滅眾生煩惱之患。」

庚二、具妙觀察智

「從如來生，解法如如。善知集滅，音聲方便。
不欣世語，樂在正論。修諸善本，志崇佛道。」

庚三、具平等性智

「知一切法，皆悉寂滅。生身煩惱，二餘俱盡。聞甚深法，心不疑懼。
常能修行，其大悲者，深遠微妙，靡不覆載。」

「究竟一乘，至於彼岸。決斷疑網，慧由心出。於佛教法，該羅無外。智慧如大海，三昧如山王。慧光明淨，超踰日月。清白之法，具足圓滿。」

戊三、喻歎（分三）

己一、喻體德尊勝

「猶如雪山，照諸功德，等一淨故。猶如大地，淨穢好惡，無異心故。

猶如淨水，洗除塵勞，諸垢染故。猶如火王，燒滅一切煩惱薪故。

猶如大風，行諸世界，無障礙故。猶如虛空，於一切有，無所著故。

猶如蓮華，於諸世間，無染污故。」

己二、喻用德自在

「猶如大乘，運載群萌，出生死故。猶如重雲，震大法雷，覺未覺故。

猶如大雨，雨甘露法，潤眾生故。如金剛山，眾魔外道，不能動故。」

如梵天王，於諸善法，最上首故。如尼拘類樹，普覆一切故。如優曇鉢華，希有難遇故。如金翅鳥，威伏外道故。

如眾遊禽，無所藏積故。猶如牛王，無能勝故。

猶如象王，善調伏故。如獅子王，無所畏故。」

己三、喻歎體用無礙

「曠若虛空，大慈等故。」

戊四、合法（分二）

己一、合二利圓滿

「摧滅嫉心，不忍勝故。

專樂求法，心無厭足。常欲廣說，志無疲倦。

擊法鼓，建法幢。曜慧日，除癡闇。

修六和敬，常行法施。志勇精進，心不退弱。

為世燈明，最勝福田。常為師導，等無憎愛。唯樂正道，無餘欣戚。

拔諸欲刺，以安群生。

功慧殊勝，莫不尊敬。

滅三垢障，遊諸神通。」

已二、合二力具足

「因力，緣力，意力，願力，方便之力，常力，善力，定力，慧力，多聞之力。

施戒忍辱，精進禪定，智慧之力。正念止觀，諸通明力。如法調伏諸眾生力。如是等力，一切具足。

身色相好，功德辯才，具足莊嚴，無與等者。

恭敬供養無量諸佛，常為諸佛所共稱歎。

究竟菩薩諸波羅蜜。修空無相無願三昧，不生不滅諸三昧門，遠離聲聞緣覺之地。」

戊五、結歎功德無盡

「阿難！彼諸菩薩，成就如是無量功德，我但為汝略言之耳。若廣說者，百千萬劫，不能窮盡。」

丁六、勸進往生（分三）

戊一、舉彼國依正殊勝以勸欣求

佛告彌勒菩薩、諸天人等：「無量壽國，聲聞菩薩，功德智慧，不可稱說。又其國土，微妙安樂，清淨若此。何不力為善，念道之自然。」

著於無上下，洞達無邊際。宜各勤精進，努力自求之。必得超絕去，往生安樂國。橫截五惡道，惡道自然閉。

昇道無窮極，易往而無人。其國不逆違，自然之所牽。
何不棄世事，勤行求道德。可得極長生，壽樂無有極。」

戊二、舉此間三毒過患以勸厭捨（分四）

「然世人薄俗，共諍不急之事，於此劇惡極苦之中，勤身營務，以自給濟。無尊無卑，無貧無富，少長男女，共憂錢財。有無同然，憂思適等。屏營愁苦，累念積慮。為心走使，無有安時。」

有田憂田，有宅憂宅。牛馬六畜，奴婢錢財，衣食什物，復共憂之。重思累息，憂念愁怖。

橫為非常，水火盜賊，怨家債主，焚漂劫奪，消散磨滅。憂毒忪忪，無有解時。結憤心中，不離憂惱。心堅意固，適無縱捨。

或坐摧碎，身亡命終，棄捐之去，莫誰隨者。

尊貴豪富，亦有斯患。憂懼萬端，勤苦若此，結眾寒熱，與痛共居。

貧窮下劣，困乏常無。無田亦憂欲有田，無宅亦憂欲有宅。無牛馬六畜，奴婢錢財，衣食什物，亦憂欲有之。適有一，復少一，有是少是，思有齊等。

適欲具有，便復糜散。如是憂苦，當復求索，不能時得，思想無益。身心俱勞，坐起不安，憂念相隨，勤苦若此，亦結眾寒熱，與痛共居。或時坐之終身天命。不肯為善，行道進德。壽終身死，當獨遠去，有所趣向，善惡之道，莫能知者。」

己二、舉瞋過

「世間人民，父子兄弟，夫婦家室，中外親屬，當相敬愛，無相憎嫉。有無相通，無得貪惜，言色常和，莫相違戾。

或時心諍，有所恚怒，今世恨意，微相憎嫉，後世轉劇，至成大怨。所以者何？世間之事，更相患害，雖不即時，應急相破，然含毒畜怒，結憤精神，自然剋識，不得相離，皆當對生，更相報復。

人在世間，愛欲之中，獨生獨死，獨去獨來，當行至趣苦樂之地，身自當之，無有代者。善惡變化，殃福異處，宿豫嚴待，當獨趣入，遠到他所，莫能見者。善惡自然，追行所生，窈窈冥冥，別離長久，道路不同，會見無期，甚難甚難。

今得相值，何不棄眾事，各遇強健時，努力勤修善，精進願度世，可得極長生。如何不求道，安所須待，欲何樂乎？」

己三、舉癡過（分二）

庚一、舉癡相（分三）

辛一、不信因果

「如是世人，不信作善得善，為道得道。不信人死更生，惠施得福。善惡之事，都不信之，謂之不然，終無有是。但坐此故，且自見之，更相瞻視，先後同然。」

辛二、不遇善友

「轉相承受，父餘教令，先人祖父，素不為善，不識道德。身愚神闇，心塞意閉。死生之趣，善惡之道，自不能見，無有語者。吉凶禍福，競各作之，無一怪也。」

辛三、不信經法

「生死常道，轉相嗣立，或父哭子，或子哭父，兄弟夫婦，更相哭泣。顛倒上

下，無常根本，皆當過去，不可常保。

教語開導，信之者少，是以生死流轉，無有休止。

如此之人，蒙冥抵突，不信經法，心無遠慮，各欲快意。」

庚二、明癡過（分二）

辛一、總明

「癡惑愛欲，不達於道德，迷沒於瞋怒，貪狼於財色。」

辛二、別明（分三）

壬一、癡所生過

「坐之不得道，當更惡趣苦，生死無窮已，哀哉甚可傷！

或時室家父子，兄弟夫婦，一死一生，更相哀愍。恩愛思慕，憂念結縛，心意痛著，迭相顧戀，窮日卒歲，無有解已。教語道德，心不開明，思想恩好，不離情

欲。

昏蒙闇塞，愚惑所覆，不能深思熟計，心自端正，專精行道，決斷世事。便旋至竟，年壽終盡，不能得道，無可奈何！」

壬二、癡起貪過

「總猥憤擾，皆貪愛欲。惑道者眾，悟之者少。世間匆匆，無可聊賴。」

壬三、癡起瞋過

「尊卑上下，貧富貴賤，勤苦勿務，各懷殺毒。惡氣窈冥，為妄興事。違逆天地，不從人心。自然非惡，先隨與之，恣聽所為，待其罪極，其壽未終，便頓奪之。」

己四、結說苦報無盡

「下入惡道，累世勤苦，展轉其中，數千億劫，無有出期，痛不可言，甚可哀愍！」

戊三、勉離惡修善勸進往生（分六）

己一、略勉徵問（分五）

庚一、勉人離惡

佛告彌勒菩薩、諸天人等：「我今語汝，世間之事，人用是故，坐不得道，當熟思計，遠離眾惡。」

庚二、勉人修善

「擇其善者，勤而行之。」

庚三、勉人厭捨娑婆

「愛欲榮華，不可常保，皆當別離，無可樂者。」

庚四、勉人願生極樂

「遇佛在世，當勤精進。其有至願生安樂國者，可得智慧明達，功德殊勝。勿得隨心所欲，虧負經戒，在人後也。」

庚五、有疑當問

「儻有疑意，不解經者，可具問佛，當為說之。」

己二、彌勒申解

彌勒菩薩長跪白言：「佛威神尊重，所說快善。聽佛經語，貫心思之，世人實爾，如佛所言。」

今佛慈愍，顯示大道，耳目開明，長得度脫，聞佛所說，莫不歡喜。諸天人民，蠕動之類，皆蒙慈恩，解脫憂苦。

佛語教戒，甚深甚善，智慧明見，八方上下，去來今事，莫不究暢。今我眾等，所以蒙得度脫，皆佛前世求道之時，謙苦所致。恩德普覆，福祿巍巍。光明徹照，達空無極，開入泥洹。

教授典攬，威制消化。感動十方，無窮無極。佛為法王，尊超眾聖，普為一切天人之師，隨心所願，皆令得道。今得值佛，復聞無量壽聲，靡不歡喜，心得開明。」

己三、佛法難遇，多劫難成勸

佛告彌勒：「汝言是也。若有慈敬於佛者，實為大善。天下久久，乃復有佛。」

今我於此世作佛，演說經法，宣布道教，斷諸疑網。拔愛欲之本，杜眾惡之源。遊步三界，無所罣礙。典攬智慧，眾道之要。

執持網維，昭然分明，開示五趣，度未度者，決正生死泥洹之道。」

「彌勒當知！汝從無數劫來，修菩薩行，欲度眾生，其已久遠。從汝得道，至於泥洹，不可稱數。

汝及十方諸天人民一切四眾，永劫以來，展轉五道，憂畏勤苦，不可具言，乃至今世，生死不絕，與佛相值，聽受經法，又復得聞無量壽佛，快哉甚善，吾助爾喜。」

已四、清淨三業，一生成就勸

「汝今亦可自厭生死老病痛苦，惡露不淨，無可樂者。

宜自決斷，端身正行，益作諸善。修己潔淨，洗除心垢。言行忠信，表裏相應。人能自度，轉相拯濟。精明求願，積累善本。雖一世勤苦，須臾之間，後生無

量壽國，快樂無極。

長與道德合明，永拔生死根本。無復貪恚愚癡，苦惱之患。

欲壽一劫百劫，千億萬劫，自在隨意，皆可得之。無為自然，次於泥洹之道。」

己五、不得疑悔勸

「汝等宜各精進，求心所願，無得疑惑中悔，自為過咎，生彼邊地七寶宮殿，五百歲中受諸厄也。」

己六、彌勒奉行

彌勒白言：「受佛重誨，專精修學，如教奉行，不敢有疑。」

丁七、勸修十善（分三）

戊一、略舉五惡（分三）

己一、歎前起後

佛告彌勒：「汝等能於此世，端心正意，不作眾惡，甚為至德，十方世界，最

無倫匹。

所以者何？諸佛國土，天人之類，自然作善，不大為惡，易可開化。」

己二、總舉勸意

「今我於此世間作佛，處於五惡五痛五燒之中，為最劇苦，教化群生。令捨五惡，令去五痛，令離五燒，降化其意，令持五善，獲其福德度世長壽泥洹之道。」

己三、徵問五惡

佛言：「何等五惡？何等五痛？何等五燒？何等消化五惡，令持五善，獲其福德度世長壽泥洹之道？」

戊二、詳釋十惡，勸修十善（分五）

己一、殺生惡（分四）

庚一、明殺業

「其一惡者，諸天人民蠕動之類，欲為眾惡，莫不皆然。」

強者伏弱，轉相剋賊。殘害殺戮，迭相吞噬。不知修善，惡逆無道。」

庚二、明殺報（分三）

辛一、生報

「後受殃罰，自然趣向。神明記識，犯者不赦。

故有貧窮下賤，乞丐孤獨，聾盲瘡啞，愚癡弊惡，至有尫狂不逮之屬。

又有尊貴豪富，高才明達，皆由宿世慈孝，修善積德所致。」

辛二、現報

「世有常道，王法牢獄，不肯畏慎，為惡入罪，受其殃罰。求望解脫，難得勉出，世間有此目前現事。」

辛三、後報

「壽終後世，尤深尤劇。入其幽冥，轉生受身。

譬如王法，痛苦極刑。故有自然三塗，無量苦惱。

轉貿其身，改形易道。所受壽命，或長或短。魂神精識，自然趣之。當獨值向，相從共生。更相報復，無有止已。

殃惡未盡，不得相離。展轉其中，無有出期，難得解脫，痛不可言！」

庚三、明因果不爽

「天地之間，自然有是，雖不即時卒暴應至，善惡之道，會當歸之。」

庚四、結勸斷惡修善

「是為一大惡一痛一燒，勤苦如是。譬如大火焚燒人身。

人能於中一心制意，端身正行，獨作諸善，不為眾惡者。

身獨度脫，獲其福德度世上天泥洹之道，是為一大善也。」

己二、偷盜因（分四）

庚一、明盜因

佛言：「其二惡者，世間人民，父子兄弟，室家夫婦，都無義理，不順法度。

奢淫僇縱，各欲快意。」

庚二、明盜業

「任心自恣，更相欺惑。心口各異，言念無實。

佞諂不忠，巧言諛媚。嫉賢謗善，陷入冤枉。

主上不明，任用臣下。臣下自在，機偽多端。踐度能行，知其形勢。

在位不正，為其所欺。妄損忠良，不當天心。

臣欺其君，子欺其父。兄弟夫婦，中外知識，更相欺誑。

各懷貪欲瞋恚愚癡。欲自厚戍，欲貪多有。尊卑上下，心俱同然。

破家亡身，不顧前後。親屬內外，坐之滅族。

或時室家知識，鄉黨市里，愚民野人，轉共從事。更相利害，忿成怨結。

富有慳惜，不肯施與，愛保貪重，心勞身苦。」

庚三、明盜報（分三）

辛一、生報

「如是至竟，無所恃怙。獨來獨去，無一隨者。善惡禍福，追命所生。或在樂處，或入苦毒，然後乃悔，當復何及！」

辛二、現報

「世間人民，心愚少智。見善憎謗，不思慕及。但欲為惡，妄作非法。常懷盜心，希望他利。消散磨盡，而復求索。邪心不正，懼人有色。不豫思計，事至乃悔。今世現有，王法牢獄，隨罪趣向，受其殃罰。」

辛三、後報

「因其前世不信道德，不修善本，今復為惡。

天神剋識，別其名籍，壽終神逝，下入惡道。故有自然三塗，無量苦惱，展轉其中。

世世累劫，無有出期，難得解脫，痛不可言！」

「是為二大惡、二痛、二燒，勤苦如是。譬如大火焚燒人身。

人能於中一心制意，端身正行，獨作諸善，不為眾惡者。

身獨度脫，獲其福德度世上天泥洹之道，是為二大善也。」

己三、邪淫惡（分三）

庚一、明邪淫業

佛言：「其三惡者，世間人民，相因寄生，共居天地之間。處年壽命，無能幾何。

上有賢明長者，尊貴豪富，下有貧窮廝賤，尪劣愚夫，中有不善之人，常懷邪惡，但念淫佚，煩滿胸中。

愛欲交亂，坐起不安。貪意守惜，但欲唐得。

眇眇細色，邪態外逸。自妻厭憎，私妄出入，費損家財，事為非法。

交結聚會，興師相伐，攻劫殺戮，強奪無道。
惡心在外，不自修業，盜竊趣得，欲擊成事。
恐勢迫脅，歸給妻子，恣心快意，極身作樂。
或於親屬，不避尊卑，家室中外，患而苦之，亦復不畏王法禁令。」

庚二、明邪淫報

「如是之惡，著於人鬼。日月照見，神明記識。故有自然三塗，無量苦惱。展轉其中，世世累劫，無有出期，難得解脫，痛不可言！」

庚三、結勸斷惡修善

「是為三大惡三痛三燒，勤苦如是。譬如大火焚燒人身。
人能於中一心制意，端身正行，獨作諸善，不為眾惡者。
身獨度脫，獲其福德度世上天泥洹之道，是為三大善也。」

己四、口業四惡（分三）

庚一、明口四惡業

佛言：「其四惡者，世間人民，不念修善。轉相教令，共為眾惡。兩舌、惡口、妄言、綺語。

讒賊鬥亂，憎嫉善人，敗壞賢明，於傍快喜。

不孝二親，輕慢師長。

朋友無信，難得誠實。尊貴自大，謂己有道。橫行威勢，侵易於人。

不能自知，為惡無恥。自以強健，欲人敬難。

不畏天地神明日月，不肯作善，難可降化。自用偃蹇，謂可常爾。無所憂懼，常懷憍慢。」

庚二、明口惡報（分三）

辛一、現報

「如是眾惡，天神記識。賴其前世頗作福德，小善扶接，營護助之。今世為惡，

福德盡滅，諸善鬼神，各去離之，身獨空立，無所復依。」

辛二、生報

「壽命終盡，諸惡所歸。自然迫促，共趣奪之。又其名籍，記在神明。

殃咎牽引，當往趣向。罪報自然，無從捨離。但得前行，入於火鑊。身心摧碎。

精神痛苦。當斯之時，悔復何及。」

辛三、後報

「天道罔然，不得蹉跌。故有自然三塗，無量苦惱。展轉其中，世世累劫，無有出期，難得解脫，痛不可言。」

庚三、結勸斷惡修善

「是為四大惡四痛四燒，勤苦如是。譬如大火焚燒人身。

人能於中一心制意，端身正行，獨作諸善，不為眾惡。

身獨度脫，獲其福德度世上天泥洹之道，是為四大善也。」

己五、意業眾惡（分三）

庚一、明意惡業

佛言：「其五惡者，世間人民，徙倚懈惰，不肯作善，治身修業。

家室眷屬，飢寒困苦，父母教誨，瞋目怒應，言令不和，違戾反逆，譬如怨家，不如無子。

取與無節，眾共患厭。負恩違義，無有報償之心，貧窮困乏，不能復得。辜較縱奪，放恣遊散。串數唐得，用自賑給。

耽酒嗜美，飲食無度，肆心蕩逸，魯扈抵突。

不識人情，強欲抑制。見人有善，妒嫉惡之。

無義無禮，無所顧難，自用識當，不可諫曉。六親眷屬，所資有無，不能憂念。

不惟父母之恩，不存師友之義。

心常念惡，口常言惡，身常行惡，曾無一善。

不信先聖諸佛經法，不信行道可得度世，不信死後神明更生。不信作善得善，為惡得惡。

欲殺真人，鬥亂眾僧。欲害父母兄弟眷屬，六親憎惡，願令其死。

如是世人，心意俱然，愚癡蒙昧而自以智慧，不知生所從來，死所趣向。不仁不順，惡逆天地。而於其中，希望僥倖。欲求長生，會當歸死。

慈心教誨，令其念善，開示生死善惡之趣，自然有是，而不肯信之。

苦心與語，無益其人，心中閉塞，意不開解，大命將終，悔懼交至。不豫修善，臨窮方悔，悔之於後，將何及乎？」

庚二、明意惡報

「天地之間，五道分明，恢廓窈冥，浩浩茫茫。

善惡報應，禍福相承，身自當之，無誰代者。

數之自然，應期所行，殃咎追命，無得縱捨。

善人行善，從樂入樂，從明入明。惡人行惡，從苦入苦，從冥入冥。誰能知者，獨佛知耳。

教語開示，信用者少，生死不休，惡道不絕，如是世人，難可具盡。

故有自然三塗，無量苦惱，展轉其中，世世累劫，無有出期，難得解脫，痛不可言！」

庚三、結勸斷惡修善

「是為五大惡，五痛五燒，勤苦如是。譬如大火焚燒人身。

人能於中，一心制意，端身正念，言行相副，所作至誠，所語如語，心口不轉，獨作諸善，不為眾惡。

身獨度脫，獲其福德度世上天泥洹之道，是為五大善也。」

戊三、結說五惡（分四）

己一、結說惡業

佛告彌勒：「吾語汝等，是世五惡，勤苦若此，五痛五燒，展轉相生。但作眾惡，不修善本，皆悉自然入諸惡趣。」

己二、結說惡報（分三）

庚一、現報

「或其今世，先被殃病，求死不得，求生不得，罪惡所招，示眾見之。」

庚二、生報

「身死隨行，入三惡道，苦毒無量，自相焦然。」

庚三、後報

「至其久後，共作怨結，從小微起，遂成大惡。」

己三、結說惡因

「皆由貪著財色，不能施惠。」

癡欲所迫，隨心思想，煩惱結縛，無有解已。

厚己諍利，無所省錄。

富貴榮華，當時快意。不能忍辱，不務修善。威勢無幾，隨以磨滅。」

己四、結說因果

「身坐勞苦，久後大劇。天道弛張，自然糺舉。網維羅網，上下相應。兢兢忪忪，當入其中。古今有是，痛哉可傷。」

丁八、重重誨勉（分五）

戊一、總示佛意

佛語彌勒：「世間如是，佛皆哀之。以威神力，摧滅眾惡，悉令就善。棄捐所思，奉持經戒。受行道法，無所違失，終得度世泥洹之道。」

戊二、重教修善

佛言：「汝今諸天人民，及後世人，得佛經語，當熟思之，能於其中，端心正

行。

主上為善，率化其下，轉相敕令，各自端守。

尊聖敬善，仁慈博愛，佛語教誨，無敢虧負。

當求度世，拔斷生死眾惡之本，當離三塗無量憂怖苦痛之道。

汝等於是廣植德本，布恩施惠，勿犯道禁，忍辱精進，一心智慧。

轉相教化，為德立善。

正心正意，齋戒清淨，一曰一夜，勝在無量壽國為善百歲。

所以者何？彼佛國土，無為自然，皆積眾善，無毛髮之惡。

於此修善十曰十夜，勝於他方諸佛國中為善千歲。

所以者何？他方佛國，為善者多，為惡者少，福德自然，無造惡之地。

唯此間多惡，無有自然，勤苦求欲，轉相欺殆，心勞形困，飲苦食毒，如是惡

務，未嘗寧息。」

己一、勉人修善得道

「吾哀汝等天人之類，苦心誨喻，教令修善。隨宜開導，授與經法，莫不承用。在意所願，皆令得道。」

己二、勉人皈敬三寶

「佛所遊履，國邑丘聚，靡不蒙化。

天下和順，日月清明。風雨以時，災厲不起。

國豐民安，兵戈無用。崇德興仁，務修禮讓。」

己三、勉人離惡滅苦

佛言：「我哀愍汝等諸天人民，甚於父母念子。

今我於此世作佛，降化五惡，消除五痛，絕滅五燒。以善攻惡，拔生死之苦。」

己四、勉人往生極樂

「令獲五德，升無為之安。」

戊四、世尊懸記

「吾去世後，經道漸滅。人民諂偽，復為眾惡。五燒五痛，還如前法，久後轉劇，不可悉說，我但為汝略言之耳。」

佛語彌勒：「汝等各善思之，轉相教誡，如佛經法，無得犯也！」

戊五、彌勒奉行

於是彌勒菩薩，合掌白言：「佛所說甚善，世人實爾。如來普慈哀愍，悉令度脫，受佛重誨，不敢違失！」

丙三、見彌陀示當明信（分五）

丁一、教見彌陀

佛告阿難：「汝起，更整衣服，合掌恭敬，禮無量壽佛。十方國土諸佛如來，常共稱揚讚歎彼佛，無著無礙。」

丁二、阿難求見

於是阿難起，整衣服，正身西面，恭敬合掌，五體投地，禮無量壽佛。

白言：「世尊，願見彼佛安樂國土，及諸菩薩聲聞大眾。」

丁三、壽佛放光

說是語已，即時無量壽佛，放大光明，普照一切諸佛世界。金剛圍山、須彌山王、大小諸山，一切所有，皆同一色。

譬如劫水彌滿世界，其中萬物沈沒不現，滉漾浩汗，唯見大水。

彼佛光明，亦復如是，聲聞菩薩，一切光明，皆悉隱蔽，唯見佛光，明耀顯赫。

丁四、彼此相見

爾時阿難，即見無量壽佛，威德巍巍，如須彌山王，高出一切諸世界上。相好光明，靡不照耀。此會四眾，一時悉見。彼見此土，亦復如是。

丁五、當機述見

爾時佛告阿難，及慈氏菩薩：「汝見彼國，從地已上，至淨居天，其中所有微

妙嚴淨自然之物，為悉見不？」阿難對曰：「唯然，已見。」

「汝寧復聞無量壽佛，大音宣布一切世界，化眾生不？」阿難對曰：「唯然，已聞。」

「彼國人民，乘百千由旬七寶宮殿，無所障礙，遍至十方供養諸佛，汝復見不？」對曰：「已見。」

「彼國人民，有胎生者，汝復見不？」對曰：「已見。」「其胎生者，所處宮殿，或百由旬，或五百由旬。各於其中受諸快樂，如忉利天上，亦皆自然。」

丙四、說疑城誠勿生疑（分五）

丁一、示不了佛智之過

爾時，慈氏菩薩白佛言：「世尊！何因何緣，彼國人民，胎生、化生？」

佛告慈氏：「若有眾生，以疑惑心，修諸功德，願生彼國。不了佛智，不思議智，不可稱智，大乘廣智，無等無倫最上勝智。於此諸智，疑惑不信。然猶信罪福，

修習善本，願生其國。

此諸眾生，生彼宮殿，壽五百歲，常不見佛、不聞經法，不見菩薩聲聞聖眾。是故於彼國土，謂之胎生。」

丁二、示明信佛智之益

「若有眾生，明信佛智，乃至勝智，作諸功德，信心迴向。

此諸眾生，於七寶華中，自然化生，跏趺而坐。須臾之頃，身相光明，智慧功德，如諸菩薩具足成就。」

丁三、舉勝顯劣，以誠勿疑

「復次慈氏！他方諸大菩薩，發心欲見無量壽佛，恭敬供養，及諸菩薩聲聞聖眾。彼菩薩等，命終得生無量壽國，於七寶華中，自然化生。」

「彌勒當知！彼化生者，智慧勝故。其胎生者，皆無智慧。於五百歲中，常不見佛、不聞經法、不見菩薩諸聲聞眾。

無由供養於佛，不知菩薩法式，不得修習功德。當知此人，宿世之時，無有智慧，疑惑所致。」

丁四、舉喻顯過，惑盡見佛

佛告彌勒：「譬如轉輪聖王，有七寶牢獄，種種莊嚴，張設床帳，懸諸綵蓋。若有諸小王子，得罪於王，輒內彼獄中，繫以金鎖。供養飯食衣服床蓐，華香伎樂，如轉輪王，無所乏少。

於意云何？此諸王子，寧樂彼處不？」

對曰：「不也！但種種方便，求諸大力，欲自勉出。」

佛告彌勒：「此諸眾生，亦復如是。以疑惑佛智故，生彼七寶宮殿，無有刑罰，乃至一念惡事。

但於五百歲中，不見三寶，不得供養、修諸善本，以此為苦。雖有餘樂，猶不樂彼處。

若此眾生，識其本罪，深自悔責，求離彼處。即得如意，往詣無量壽佛所，恭敬供養。亦得遍至無量無數諸餘佛所，修諸功德。」

丁五、總誡明信勿疑

「彌勒當知！其有菩薩，生疑惑者，為失大利，是故應當，明信諸佛無上智慧。」

丙五、示化益十方往生（分四）

丁一、先明此土菩薩往生（分二）

戊一、彌勒申問化益

彌勒菩薩白佛言：「世尊！於此世界，有幾所不退菩薩，生彼佛國？」

戊二、佛舉此界往生

佛告彌勒：「於此世界，六十七億不退菩薩，往生彼國。一一菩薩，已曾供養無數諸佛，次如彌勒者也。諸小行菩薩，及修習少功德者，不可稱計，皆當往生。」

丁二、次明十三佛國菩薩往生

佛告彌勒：「不但我刹諸菩薩等，往生彼國，他方佛土，亦復如是。

其第一佛，名曰遠照。彼有百八十億菩薩，皆當往生。

其第二佛，名曰寶藏。彼有九十億菩薩，皆當往生。

其第三佛，名曰無量音，彼有二百二十億菩薩，皆當往生。

其第四佛，名曰甘露味。彼有二百五十億菩薩，皆當往生。

其第五佛，名曰龍勝。彼有十四億菩薩，皆當往生。

其第六佛，名曰勝力。彼有萬四千菩薩，皆當往生。

其第七佛，名曰師子。彼有五百億菩薩，皆當往生。

其第八佛，名曰離垢光。彼有八十億菩薩，皆當往生。

其第九佛，名曰德首。彼有六十億菩薩，皆當往生。

其第十佛，名曰妙德山。彼有六十億菩薩，皆當往生。

其第十一佛，名曰人王。彼有十億菩薩，皆當往生。

其第十二佛，名曰無上華。彼有無數不可稱計諸菩薩眾，皆不退轉，智慧勇猛，已曾供養無量諸佛。於七日中，即能攝取，百千億劫，大士所修堅固之法。斯等菩薩，皆當往生。

其第十三佛，名曰無畏。彼有七百九十億大菩薩眾，諸小菩薩，及比丘等，不可稱計，皆當往生。」

丁三、後明十方無量菩薩往生

佛語彌勒：「不但此十四佛國中諸菩薩等，當往生也。十方世界無量佛國，其往生者，亦復如是，甚多無數。」

丁四、結歎化益無盡

「我但說十方諸佛名號，及菩薩比丘生彼國者，晝夜一劫，尚未能盡，我今為汝略說之耳！」

甲三、流通分（分四）

乙一、歎經勸學（分五）

丙一、舉聞益勸當受行

佛告彌勒：「其有得聞彼佛名號，歡喜踊躍，乃至一念，當知此人為得大利，則是具足無上功德。」

是故彌勒！設有大火，充滿三千大千世界，要當過此，聞是經法，歡喜信樂，受持讀誦，如說修行。

所以者何？多有菩薩，欲聞此經，而不能得。若有眾生，聞此經者，於無上道，終不退轉。是故應當專心信受，持誦說行。」

丙二、教求見囑勿生疑

「吾今為諸眾生，說此經法，令見無量壽佛，及其國土，一切所有。所當為者，皆可求之。無得以我滅度之後，復生疑惑。」

丙三、舉經益特留此經

「當來之世，經道滅盡，我以慈悲哀愍，特留此經，止住百歲。其有眾生，值斯經者，隨意所願，皆可得度。」

丙四、示五難生人尊敬

佛語彌勒：「如來興世，難值難見。

諸佛經道，難得難聞。

菩薩勝法，諸波羅蜜，得聞亦難。

遇善知識，聞法能行，此亦為難。

若聞斯經，信樂受持，難中之難，無過此難。」

丙五、結勸修學

「是故我法如是作，如是說，如是教，應當信順，如法修行。」

乙二、彰說利益（分二）

丙一、起願益

爾時世尊，說此經法，無量眾生，皆發無上正覺之心。

丙二、得果益（分二）

丁一、四果益

萬二千那由他人，得清淨法眼。二十二億諸天人民，得阿那含果。八十萬比丘，漏盡意解。

丁二、成佛益

四十億菩薩，得不退轉。以弘誓功德而自莊嚴，於將來世，當成正覺。

乙三、化周現瑞

爾時，三千大千世界，六種震動，大光普照十方國土，百千音樂，自然而作，無量妙華，芬芬而降。

乙四、大眾奉行

佛說經已，彌勒菩薩，及十方來諸菩薩眾、長老阿難、諸大聲聞、一切大眾，靡不歡喜。